



玉函山房輯佚書

八十七

口 11
1236
87



1236

門
1236
卷
87



目耕帖卷十

歷城馬國翰竹吾甫

書五

王朝步自周鄭元注步行也堂下謂之步豐鎬異地
 而言步者告武王廟卽行不遠爲父恭也程大昌
 雍錄步行二十五里則又太遠顧炎武日知錄不
 敢乘車而步出國門敬之至也此說得之周輝清
 波雜志呂大防言前代人主在宮禁之中亦乘輿
 輦祖宗皆步自內庭出御前殿此謹身之法也明

太祖實錄吳元年以諸子年長宜習勤勞使不驕
惰命內侍製麻履行勝每出城稍遠則馬行其二
步趨其一開國之君不敢驕恣卽此一端猶得先
王心法云

惟丙午朏正義引周書月令云三日粵朏漢書律歷
志引古文月采篇曰三日曰朏師古曰謂說月之
光采困學紀聞引此云疑采字當作令方彙如箋
魯語有少采夕月之文采字不必疑然則月采古
文佚篇之名正義亦引月采篇文作月令失之漢

書孟康注古文蠢爲朏王應麟漢藝文考惟丙午
蠢段氏玉裁云蓋惟丙午朏之異文今文尙書也
日知錄古者吉行日五十里故召公營洛乙未自周
戊申朝至于洛凡十有四日師行日三十里故武
王伐紂癸巳自周戊午師渡孟津凡二十有五
日漢書以爲三十一日誤

詩昊天有成命序以爲郊祀天地也正義謂南郊祀
天北郊祀地周禮大宗伯蒼璧禮天黃琮禮地大
司樂言圜丘方澤祭法燔柴於泰壇天也瘞埋於

秦折祭地也皆天地並言召誥用牲于郊牛二集傳祭天地也故用二牛蓋兼南北郊言各攻其位成而祭之也孔傳謂立郊位於天以后稷配之故二牛不言祭地而言稷配營成新邑不應祭天而不祭地且與下社兼祀稷重複孔傳疏矣乃社于新邑孔傳告立社稷之位傳用太牢共工氏子曰句龍能平水土祀以爲社周祖后稷能殖百穀祀以爲稷社稷共牢正義經有社無稷稷是社類知其同告之告立社稷之位其祭用太牢故牛羊

豕各一也又云漢世儒者說社稷有二左氏說社稷惟祭句龍后稷人神而已是孔之所用孝經說社爲土神稷爲穀神句龍后稷配食者是鄭之所從集傳但云社祭用太牢似又不若孔傳之賅備自服于土中白虎通土中所以均教道平往來使明當懼慎損於善惡爲善易以聞爲惡易以聞史記婁敬傳成王卽位周公營成周以爲此天下中有德則易以王無德則易以亡呂氏春秋引南宮括曰成王定成周其辭曰惟余一人營居于成周惟

余一人有善易得而見也有不善易得而誅也說苑載南宮邊子曰昔成王之卜居成周也其命龜曰予一人兼有天下辟就百姓敢無中上乎使予有罪則四方伐之無難得也數說略同宋敏求長安志引五經要義云王者受命創始立國立都必居中土所以總天地之和據陰陽之正均統四方以制萬國者也王安石新經義成王欲擇洛邑者以天時言則日東景夕多風日西景朝多陰日南景短多暑日北景長多寒洛天地之中風雨之所

會陰陽之所和也以人事言則四方朝聘貢賦道里均焉故謂之土中與異義說台蔡傳取之案土中兼此二義後義所謂大法前義所謂大戒也詩大雅思齊鄭箋引書越乃御事無自字漢書孔光傳太后詔無遺耆老此引召誥而壽耆作者老論衡率性篇引書今王初服厥命於戲若生子罔不在厥初生王乃初服作今王初服下有厥命二字嗚呼作於戲皆今文也

漢書王莽傳引朕復子明辟以爲周公常稱王命專

行不報故言我復子明君也此雖古文家說而新莽居攝假託周公因以此爲藉口集傳復如逆復之復復成王命周公往營成周周公得卜復命於王也謂成王爲子者親之也謂成王爲明辟者尊之也可謂挾經之心矣

鄭康成云灑水東旣成名曰成周今洛陽縣是也召公所卜處名曰王城今河南縣是也陳經尙書詳解鎬爲天地形勝之區據上游而制六合其慮天下也遠故曰宗國明萬國所宗也洛承天地冲和

之氣定土中而葢四海其示天下也公故曰成周明王道之所成也

我二人共貞釋云貞正也馬云當也集傳從季長說夏僎尙書解貞如厥賦貞之貞謂相當也薛嘉穎書經菁華成湯之於伊尹一德曰咸有成王之於周公二人曰共貞千古相業所以伊周並稱也

白虎通引書曰肇稱殷禮祀新邑祀下無于字云此言太平去殷禮尙書大傳引書曰乃女其悉自學功汝作女教工作學功云悉盡也學效也傳曰盡

其天下諸侯之志而效天下諸侯之功也又引書
曰揚文武之德烈奉對天命和恒四方民此皆今
文舊說

漢書梅福傳引書毋若火始庸庸師古曰周書洛誥
之辭庸庸微小貌也孔傳本作皦皦則作庸庸者
今文也厥攸灼敘孔傳灼然有次序釋文敘絕句
馬讀敘字屬下集傳從馬讀

尚書大傳引孔子曰吾於洛誥也而見周公之德光
明于上下勤施四方旁作穆穆至于海表莫敢不

來服莫敢不來享以勤文王之鮮光以揚武王之
大訓而天下大洽故曰聖與聖也猶規之相周知
之相襲也明光作光明耿作鮮烈作訓皆與今書
文異

命公後史浩尚書講義成王既歸命周公在後視衆
說命伯禽爲周公之後爲的朱子取之以爲看公
定予往矣一言便見得是周公且在後之意誕保
文武受命惟七年孔傳言周公攝政盡此十二月
大安文武受命之事惟七年釋文周公攝政七年

天下太平馬同鄭云文王武王受命及周公居攝
皆七年吳棫書碑傳周公自留洛之後凡七年而
薨也集傳取之

胡士行詳解多士序言頑民以賤之者愧之也經言
商王士以貴之者勸之也

敢弋殷命釋文徐音翼馬本作翼義同然則馬用古
文作翼而訓爲弋後傳古文者遂直爲弋耳

下民秉爲釋文爲于僞反案詩大雅福祿來爲鄭箋
爲猶助也釋文爲于僞反協句如字則此亦訓助

與作爲之爲不同

王充論衡自然篇周公曰上帝引佚上帝謂舜禹也
舜禹承安繼治任賢使能恭己無爲而天下治舜
禹承堯之安堯則天而行不作功邀名無爲之化
自成故曰蕩蕩乎民無能名焉以上帝爲舜禹亦
今文家說與孔傳異

有夏不適逸則惟帝降格孔傳故天下至戒以譴告
之正義古書亡失桀之災異未得盡聞案竹書紀
年帝癸十年五星錯行夜中星隕如雨地震伊洛

竭二十九年三日並出三十年瞿山崩國語周語
夏之亡也回祿信於聆隧太公金匱夏桀之時有
岑山之水桀常以十月發民鑿山穿陵通於河民
諫曰孟冬鑿山穿陵是泄天之氣發地之藏天子
失道後必有敗桀殺之其年岑山崩爲大澤墨子
夏桀之時鬼哭於國尙書中候桀無道地吐黃霧
天雨血又云夏桀無道枉矢射山亡土崩尙書緯
夏桀無道殺關龍逢夏出霜此皆見於周秦古書
可以補疏之闕

爾王家我適也

白虎通京師篇天子所都夏商曰邑周曰京師引湯
誓率割夏邑酒誥在商邑爲證又三正篇云詩命
此文王于周于京此言文王改號爲周易邑爲京
也董仲舒春秋繁露三代改制質文篇周公輔成
王受命作宮於洛陽成文武之制殷湯之後稱邑
示天之變多士云自乃邑下文敢求爾于天邑商
亦夏商稱邑之明證孟子引書惟臣附於大邑周
洛誥作新大邑于東國洛時未制禮猶用先代禮

故仍舊稱也多士篇首言新邑洛下言朕作大邑
于茲洛對商土而言如洪範因箕子而稱祀也
正義鄭云言天邑商者亦本天之所建王云商今爲
我之天邑二者其文雖異皆以天邑商爲商之舊
都

昔朕來自奄正義於時王不親行而王言我來自奄
者周公以王命誅四國周公師還是亦王命還也
翰案伐奄是攝政三年伐管蔡時事多士作於成
王卽政之元年前後相距五六年故自云昔也伐

奄爲周公事而此云昔朕來自奄可知周公攝政
凡征伐皆奉王命也先儒謂周公居攝稱王卽此
可證其謬

詩小雅破斧篇四國是皇毛傳四國管蔡商奄也蓋
霍叔罪輕不數又不數淮夷者奄在淮夷之地與
奄爲一書言大降爾四國民命與詩四國同

予惟四方罔攸賓釋文攸賓徐音殯馬云却也蓋訓
爲擯斥之擯意謂今之營洛所以接待四方之人
罔有所却也語意亦直捷

困學紀聞無逸大傳作毋逸毋者禁止之辭其義尤切案今書大傳正作無佚王充論衡引書乃作毋逸或伯厚所見之古本與今本不同乎漢書鄭崇傳注引作亡逸大傳於無佚篇又引書曰厥兆天子爵白虎通爵篇引同今經無此語段氏撰異蓋是今文尙書厥亦唯我周五字

王樵尙書日記事非其所身歷則不知來處皆艱子苟溺於情娛轉以爲老成太過乃逸數言曲盡世態王道誠不外人情也

厥子乃不知稼穡之艱難山井鼎考文宋板乃作亦嚴恭寅畏釋文嚴如字又魚檢反馬本作儼魚檢蓋舊音作音者所見本已作嚴故從馬本儼爲音也

漢石經殘碑肆高宗之饗國百年漢書杜欽傳高宗遭雉雉之亂飭已正事享百年之壽漢書五行志劉向傳皆云高宗百年論衡氣壽篇亦云高宗享國百年蓋三家本異也

其在祖甲孔傳以祖甲爲太甲鄭康成云高宗欲廢祖庚立祖甲祖甲以爲不義逃於民間正義以鄭

爲妄集傳從鄭說謂非太甲案竹書紀年祖庚十一年陟下次祖甲名載元年丁巳王卽位居殷三十三年陟與經吻合

熊良輔云聖人立命之學論理不論數顏淵之死不爲夭盜跖之生不爲壽三宗享國之永又數之適與理合者也翰案大德者必得其壽理之常也若顏子敗其叢蘭冉耕歌其芣苢時數之變未可概論

後漢書荀爽傳引周公之戒曰不知稼穡之艱難不

聞小人之勞唯耽樂之從時亦罔有克壽王充論衡語增篇引經曰唯謀樂是從時亦罔有克壽漢書鄭崇傳引周公著戒曰惟王不知艱難唯耽樂是從時亦罔有克壽同用今文尙書而小異則三家本亦不同也

文王卑服釋文卑馬本作俾使也訓俾爲使則服字當解如寤寐思服之服事也謂使服事卽康功田功率以勤也

漢石經殘碑有功田功微柔懿共懷保小人惠于矜

下闕有酒母幼于維共闕二字漢書谷永傳引經曰懷保小人惠于鰥寡又引經曰繼自今嗣王其母淫于酒母逸于遊田惟正之共惟矜作鰥餘並與石經同

中昷釋文出昷字音側云本亦作仄是古本作昷衛包等從俗作昷也說文作𠂔云日在西方時今作昷亦非說文本字

漢書楚元王傳劉向上奏翼奉傳並引王母若殷王紂後漢書梁冀傳袁著詣闕上書曰周公戒成王

無如殷王紂論衡謹告篇亦云母若殷王紂段氏撰異案無作母受作紂者今文尙書然也

民無或胥壽張爲幻釋文壽竹求反馬本作輒爾雅及詩作侑同侑張誑也說文壽讀若酬引周書無或壽張爲幻侑壽壽三音並同古通用

漢石經殘碑母兄曰今日下闕厥不聽人乃訓變亂正刑下闕則兄曰敬德厥衛曰朕之衛允下闕公曰於戲嗣王監于茲皇並作兄嗚呼作於戲他亦與今書小異

君奭書序周公爲師召公爲保釋文爲保太保也爲
師太師也馬云師氏保氏皆大夫官鄭康成亦以
師保爲周禮師氏保氏大夫之職周禮師氏保氏
注又引書序云聖賢兼此官皆用舊說而禮記文
王世子注謂大司成司徒之屬師氏也說又不同
案洛誥顧命皆稱召公爲太保當以太師太保爲
是陳櫟尙書集傳纂疏召公封燕留王朝爲保故
稱君最爲明晰

序召公不悅史記集解引馬融云召公以周公旣攝
政致太平功配文武不宜復列在臣位以爲周公
苟貪寵也此說恐非周召二公心事蔡傳爲得
其終出于不祥釋文終馬本作崇云充也漢石經殘
碑出于不祥上連道字則今文作其道出于不祥
也

漢書王莽傳引書曰我嗣事子孫大弗克共上下遇
失前人光在家不知命不易天應棊譭乃亡墜命
與今書殊異段氏撰異此今文尙書也

我道惟寧王德延釋文我道馬本作我迪案迪字義

長詩正義引鄭注云周公謂文王爲寧王成王亦謂武王爲寧王

史記燕召公世家湯時伊尹假于皇天在太戊時則有若伊陟臣扈假于上帝巫咸治王家在祖乙時則有若巫賢在武丁時則有若甘般率惟茲有陳保又有殷案今文格皆作假盤作般

逸書有咸父四篇書序謂巫咸所作馬融云巫男巫也名咸殷時巫也王充論衡言毒篇巫咸能以說延人之疾愈人之禍者案漢晉以來天文家巫咸

與甘德石申並稱後漢書天文志劉昭注瞿曇悉達開元占經並引巫咸占如辰守奎多水火災亦爲旱辰守婁多火災太白守井五穀不成之類與甘石星經相似星卜小術若未足與伊尹甘盤並稱攷楚辭有彭咸蓋古巫天文家稱爲巫咸猶云爽秋琴摯非太戊時之巫咸孔傳於書序伊陟贊於巫咸云巫咸臣名於君爽巫賢云賢巫咸子巫氏蔡傳從之可正季長之誤

天壽平格孔傳言天壽有平全之君專主君說正義

引王肅注云殷君臣之有德故安治有殷言是者不可不法殷家有良臣也又引鄭注以爲傳言臣事格謂至於天也案對君頤言鄭王說較孔爲近禮記緇衣引君頤曰在昔上帝周田觀文王之德其集大命于厥躬鄭注古文周田觀文王之德爲割申勸寧王之德今博士讀爲厥亂勸與此三者異古文似近之割之言蓋也衛湜禮記集說引陸佃云先儒謂虞芮質厥田諸侯並附以爲受命之年故曰其集大命于厥躬此解周田說亦有見也

文選王子淵四子講德論引書曰迪一人使四方若卜筮卽君頤故一人有事于四方若卜筮三家經之異文也

有若散宜生孔傳散氏宜生名論語孟子疏皆承孔說王伯厚據漢書古今人表女皇堯妃散宜氏女謂當以散宜爲氏案考古圖載周散季敦呂與叔曰敦文曰惟王二年蓋武王也武王時散氏惟散宜生季疑其字據此則孔說非無本矣

墨子文王舉閔天泰顛於罝網之中授之政而西土

服金仁山說詩免置本之顧氏日知錄引此以爲於傳未有此事必太公之事也吳斗南云太顛闕天散宜生南宮适師古謂文王之四友表於四友後列師尙父此誤也太顛與師尙父豈異人乎書大傳曰散宜生南宮适闕天學於太公望遂見西伯昌於羨里故孔子曰文王得四臣某亦得四友鄭康成謂周公作君奭舉號叔以下五人而不及太公者太師教文王以大德周公謙不可以自比誤與表同案吳氏以泰顛卽太公考太公姜姓呂

氏名尙字子牙文王得之於渭濱喜曰吾太公望子久矣故又號太公望今以泰爲太音義雖可通顛其名耶字耶號耶且惟太公與泰顛爲二人故馬融注論語亂臣十人兩列之史記周本紀云太顛闕天散宜生鬻子辛甲大夫之徒皆往歸之後復言師尙父其爲兩人又昭然矣鄭康成注不及者呂望太師也教文王以大德謙不敢以自比焉王樵日記泰誓曰予有亂臣十人何是篇獨稱四人周公所舉皆世臣舊德不及太公猶武丁世不

及傳說也

有若南宮括釋文南宮氏括名也馬本作南君然則南宮氏亦單稱南氏詩之南仲殆其族歟

漢書朱雲傳引書曰亡能往來無作亡案山井鼎考異無古本作亡

迪見冒釋文冒馬本作易勉也武王惟冒說文目部暋字引周書武王惟暋訓以爲低目視也案文之見勗得望道未見之神武之惟暋見不泄不忘之素今書皆作冒定非古文真本也

偶王在亶乘茲大命王天與纂傳大臣翊王如耕之有偶故於王曰偶大臣輔命如車之有馭故於命曰乘

我則鳴鳥不聞釋文馬云鳴鳥謂鳳皇也本或作鳴鳳者非裴松之魏志注引鄭元曰耆老也造成也老成有德之人不降志與我並在位則鳴鳥之聲不得聞况乃曰有德格於天者乎最得其解乃致辟管叔于商東萊書說管叔始造禍亂不得而赦致云者有重難之意所以深著周公之不得已

也張真父尚書小傳象得罪於舜安得不貸之以
恩管叔得罪於周安得不斷之以義二說皆深得
經蘊

史記管蔡世家蔡叔度既逐而死其子曰胡胡乃改
行率德馴善周公聞之而舉胡以爲魯卿士魯國
治於是周公言於成王復封胡於蔡以奉蔡叔之
祀是爲蔡仲司馬貞索隱尚書云蔡仲克庸祇德
周公以爲卿士叔卒乃入叩諸王邦之蔡原無仕魯
之文又伯禽居魯乃是七年致政之後此言乃說

居攝之初未知史遷何憑而有斯言也集傳周公
留佐成王食邑於圻內圻內諸侯孟仲二卿故周
公用仲爲卿非魯之卿也亦暗正史記之誤案周
公位家宰爲周卿矣不應卿之屬復爲卿士且公
雖留佐而魯實封國書明言周公以爲卿士則用
爲魯卿士可知史遷去古未遠且從孔安國問必
有所據

多方之誥曰惟五月丁亥王來自奄而多士王曰昔
朕來自奄是多方當在多士之前後人倒其篇第

耳案奄叛是武庚既誅而懼與淮夷徐戎並興而周公東征乃至於三年之久孟子曰伐奄三年討其君是也伐奄成王時事上言相武王因誅紂而連言之耳既克而成王踐奄蓋行巡狩之事也書序成王既踐奄將遷其君於蒲姑是也孔傳以奄再叛者拘於篇之先後而強爲之說不克終日勸于帝之迪釋文迪馬本作攸云所也案訓攸爲所謂不能一日勸于上帝之所不知天命而不畏也

崇亂有夏釋文作重亂上直用反又直龍反是古本作重今作崇者衛包所改

因甲于內亂孔傳言殘虐外不憂民內不勤德因甲於二亂之內言昏甚正義鄭王皆以甲爲狎王云狎習災異於內外禍亂鄭云習爲鳥獸之行於內爲淫亂與孔異也

時瀾增脩東萊書說多士言靈承于旅一多方言靈承于旅二民承君者也君於民亦曰承者民可近不可下也翰案孟子邱民爲重卽此義

洪舒于民古文作洪荼于民薛氏曰太於民荼毒也說文至部瑩忿戾也引周書有夏氏之叨瑩正義引文十八年左傳縉雲氏有不才子貪於飲食冒於貨賄天下之民謂之饕餮以爲饕卽叨也

不蠲烝釋文馬云蠲明也一音圭烝升也案蠲有涓圭二音儀禮士虞禮哀子某圭爲哀薦之饗鄭注今作蠲詩小雅吉蠲爲饗周禮秋官蜡氏鄭注引詩作吉圭云絜也並以圭爲蠲廖文英正字通唐人以漿糲紙使瑩滑名曰蠲紙音圭蓋言如圭之

潔也唐人猶用圭音今不知此音久矣

詩皇矣正義引多方云天惟五年須夏之子孫又引鄭注云夏之言暇天覬紂能改過故待暇其終至五年欲使復傳子孫五年者文王八年至十三年也又引我應云作靈臺緩優暇紂以爲文王須暇之我應中候篇名

漢書文三王傳引書曰至于再三有不用我降爾命師古曰此周書多方之辭也段氏撰異案此少至于字乃字蓋今文尙書本然

尙書大傳古者十稅一多於十稅一謂之大桀小桀
少於十稅一謂之大貊小貊王者十一而稅而頌
聲作焉故書曰越惟有胥賦小大多政今書作越
惟有胥伯小大多正孔傳於惟有相長事小大眾
正官之人古今文殊異如此
爾罔不克臬釋文臬馬本作剝案唐韻剝與剝同似
不訓爲法也

說文言部菴忌也引周書上不菴于凶德今書作爾
尙不忌于凶德蓋後人所改石匏子傷護篇妒才

智之在已菴畜貴之在其上猶用古字

林之奇全解多士稱夏迪簡在王庭有服在百僚出
之於下皆怨言也多士稱迪簡在王庭有服在大
僚出之於上皆恩命也

錢時融堂書解常伯常任準人爲三宅周禮不列其
官意卽公卿輔相之別名如保衡阿衡圻父農父
之類

說文支部岐字迫也从支白聲引周書曰常岐常任
案一切經音義古文迫岐同淮南子陽貨舉劔而

伯顧高誘注伯迫也則亦借爲伯字今經作常伯
孔傳常所長事與說文不合

其在受德譬孔傳受德紂字帝乙愛焉爲作善字而
反大惡自強呂氏春秋當務篇紂之同母三人長
曰微子啓其次曰中衍其次曰受德受德乃紂也
與孔傳同馬季長云受所爲德也案韓子原道云
道與德爲虛位人爲善則爲嘉德爲盛德人爲不
善則爲凶德爲惡德無逸曰無若殷王受之迷亂
酗于酒德哉此卽可爲德譬之證下暴德逸德與

此一例秦誓三篇唯單言受以受德爲紂字恐非
說文心部忝字引周書在受德忝亦與孔傳本異
說文火部焯明也引周書焯見三有俊心今書作灼
說文訓灼爲炙義亦少別

孟子盡心篇趙岐注引書虎賁贅衣趣馬小尹綴作
贅蓋用今文

夷微盧烝孔傳蠻夷微盧之衆帥正義烝訓衆也王
氏云微盧烝蠻夷之內屬者集傳烝或以爲衆或
以爲夷名蓋兩取之案以烝爲夷名於地理無攷

以下三亳阪尹句法例之訓衆近是

三亳阪尹孔傳亳人之歸文王者三所爲之立監及阪地之尹長正義鄭元以三亳阪尹者共爲一事云湯舊都之民服文王者分爲三邑其長居險故言阪尹蓋東成皐轅轅西降谷也鄭說爲長論衡明雩篇引書曰時則物有間之自一話一言我則末維成德之彥以又我受民惟作維王應麟漢藝文志攷漢儒所引異字有作則克度之克猶釋之宅作度皆今文尚書也

用儉人釋文儉本又作憊馬云儉利佞人也說文言部諛問也引周書勿以諛人馬與許並傳古文而互異如此

尚書大傳周傳洛誥篇以勤文王之鮮光以揚武王之太烈案卽立政篇文漢石經有文王之鮮光以揚武王八字今文立政可證

漢石經殘碑常伯常任辟下闕亂謀面用下闕于厥邑其在下闕有會心以敬事下闕王維厥度心乃下闕受滋不不其於戲下闕且以前人之微言下

闕訓德是國顯哉厥世下闕文王之鮮光以揚武
王案常任下有辟字謀面下有亂字今書皆無此
字會心俊心之異厥度心克宅心之異滋不不其
於戲茲丕丕基嗚呼之異以前人已受人之異訓
德訓下無于字顯哉顯在之異鮮光耿光之異
陳經尙書詳解君子修之吉故曰吉士大道行其常
故曰常人訓義切當
真西山曰蘇公之長國在式敬用獄苗民之絕世在
虐用五刑所以著民命之重也

周禮司刺曰斷中士師曰受中小司寇曰登中卽立
政以列用中罰之義而其源出於虞書之協中知
臯陶蘇公心法之契遠矣

張真文尙書小傳唐虞官百夏商倍之周又倍之事
繁故多官然大體未嘗變也舜命九官至商列爲
八政至周合爲六典大綱皆出於一所增特其屬
耳

陳櫟集傳纂疏明王立政惟其人爲政在人也小子
訓官勤于德取人以身也

林之奇全解功崇惟志業廣惟勤怠忽荒政之反也
惟克果斷乃罔後艱蓄疑敗謀之反也

君陳周公之子伯禽之弟見禮記坊記注正義引鄭
康成詩譜元子伯禽封於魯次子君陳世守采地
在于官春秋時周公是也又竹書紀年成王十一
年王命周平公治東都沈約注約案周平公卽君
陳周公之子伯禽之弟漢書王莽傳謂周公之子
七人蓋合魯與凡蔣邢茅胙祭則七人也不知王
官之世襲周公者在七人之外是則周公之子蓋

八人矣

惠氏棟古文尚書考坊記君陳曰爾有嘉謨嘉猷入
告爾君子內女乃順之于外曰此謀此猷惟我后
之德於乎是惟良顯哉春秋繁露所引與坊記同
云忠臣不顯諫欲其由已出也古之良大夫其事
君皆若是困學紀聞云先儒謂成王言順之一字
其弊爲諛棟謂古記所引必別有所指後儒不疑
晉出古文而追咎成王過矣案爾雅釋詁云順陳
也禮記王制順先王詩書禮樂以造士與此順字

皆當訓陳且卽將順其美成君之德也與迎合諛媚逢君長君者相去霄壤何得以此咎成王之失言哉

袁文襄編閒評忍字藏刃於心是能忍也引袁文襄必有忍其乃有濟案此說深得古人制字本義王有疾弗懌孔傳王有疾故不悅懌釋文馬本作不釋云不釋疾不解也漢書律歷志引顧命曰惟四月哉生霸王有疾不稼甲子王乃洮沫水馬傳古文尙書說文類作沫云古文作類則漢志用今文

尙書也孔傳本作弗懌與古今文並不合

王乃洮類水孔傳洮盥類面正義類是洗面知洮爲盥手釋文引馬云洮洮髮也類類面也季長說於理爲近吳志虞翻傳裴松之注引翻別傳譏鄭元所注尙書以顧命康王執瑁古月似同從誤作同旣不覺定復訓爲杯謂之酒杯成王疾困憑几洮類爲濯以爲澣衣成事洮字虛更作濯以從其非又古大篆卯字讀當爲柳古柳卯同字而以爲昧分北三苗北古別字又訓北言北猶別也若此之

類誠可怪也又云馬融訓注亦以爲同者大同天下今經益金就作銅字詁訓言天子副璽雖皆不同猶愈於元

說文几部凭字引周書凭玉几苜部莫字引周書布重莫席山部冢字引周書陳冢赤刀戈部戮字引周書侍臣執戮立于東垂金部銳字引周書冕執銳玉部玠字引周書承奉玠珪一部託字引周書三宿三祭三託口部啗字引周書太保受同祭啗並是漆書真古文

漢書古今人表第三等載芮伯師伯毛公師氏龍臣師古曰師伯尙書作彤伯龍臣尙書作武臣唐人諱虎爲武師伯龍臣此今文尙書也

宣重光釋文引馬云重光日月星也太極上元十一月朔旦冬至日月如疊璧五星如連珠故曰重光案季長之說亦泰誓若日月之照臨光于四方顯于西土之義集傳武猶文謂之重光猶舜如堯謂之重華也尤爲精確

漢石經殘碑有通殷就大命在下闕非幾滋卽下闕

通殷就達殷集之異文也

說文言部詞共也一曰讞也引周書在夏后之詞今書作在後之侗釋文引馬融本亦作詞云共也案禮記祭統鋪筵設同鄭注同之言詞也正義詞共也釋文詞徒貢反若單作同字是齊同之同非詞共之詞若詞共之詞則言旁作同故古文字林皆訓詞爲共是漢魏之時字義如此

邱光庭兼明書周書顧命云用敬保元子釗孔安國曰釗康王名也諸儒皆讀釗爲昭明日讀者非也

釗當是梟按字書六體一曰諧聲此釗字是諧聲字口邊著斗是叫字卽金邊著斗當音梟明矣今人依釗從刀者訛也且昭王是康王之子豈有子諡父諱而音同乎是周人本讀爲梟今人誤讀爲昭字矣翰案釋文釗姜遼反又音昭徐之肴反則陸氏首音亦作梟字讀

冒貢于非幾釋文貢如字馬鄭王作蠶音勑用反馬云陷也今本正義戴釋文脫此條

王崩釋文馬本作成王崩注云安民立政曰成漢書

律歷志翼日乙丑成王崩班引今文尙書與馬鄭
古文尙書並有成字今書無者傳寫誤爾

漢書古今人表第三等有中桓南宮髦仲作中毛作
髦孫氏星衍曰當是今文

薛季宣尙書古文訓春秋公卿書爵大夫字元士名
仲桓爲虎賁氏下大夫也故書字南宮毛掌干戈
爲旅賁氏中士也故書名呂伋侯爵而亦書名者
以其非六卿故書名別之

後漢書班固傳典引曰正位度宗章懷太子注尙書

曰延入翼室恤度宗按此本蔡邕典引注今文尙
書宅皆作度又典引注引尙書顓頊河圖雜書在
東序亦用今文

敷重篋席馬云織蒭也底席馬云青蒲也筍席馬云
筍箬也並見釋文薛氏古文訓引馬云筍筍箬戴
侗六書引馬云筍筍箬未知孰是

僧贊寧筍譜說筍席者多或云以箬竹爲席今詳箬
竹筍新成豈堪起而爲篋非篋安能織席此恐不
然知用筍皮殼破而編篋也故尙書正義云取筍

竹之皮以爲席是也其正義中不取筍皮皮短故連言竹之皮卽筍成竹時其皮長而可破織席明矣若取筍竹破以爲篾而織者卽同前篾席也今尙質取筍皮織也一云取如長節筍新成竹者起皮亦通而織但弱脆耳亦異篾席此合質素之義也其說甚洽物理

馬季長訓越王云越地所獻玉也與孔傳越訓於異訓夷王云東夷之美玉鄭康成云夷王東北之珣珣琪也與孔傳夷訓常異鄭又以太玉爲華山之

球玉天球雍州所貢之玉如天者以說文解珣字云繫無閭珣珣琪引周書夷王證之其他亦必有據若俞汝玉以河圖亦玉也河圖之文鑄於寶石若近世喻國人謂泉脈土湧而紋成水面於古無徵則不免失之鑿矣

大貝孔傳大貝如車輪正義引伏生書傳云散宜生之江淮取大貝如大車之渠案六韜云商王拘周西伯昌於羗里太公與散宜生金千鎰求珍物以免君罪九江之浦有大貝百馮淮南子亦載其事

此雖可爲大貝之證而非周世之寶逸周書王會解共人元貝孔晁注共人吳越之蠻元貝昭貝也又朱仲相貝經文王請大秦貝經半尋又云得拘公何貝大如輪爲文主壽則顧命陳寶之大貝也四人綦弁釋文綦馬本作騏云青黑色與詩曹風鳴鳩篇其弁伊騏合

顧命所陳七種之兵唯戈經傳多言之其餘皆無文孔傳訓惠三隅矛劉鉞屬戮瞿皆戟屬銳矛屬也正義云凡此七兵或施紿或著柄周禮戈長六尺

六寸其餘未聞長短之數翰案劉熙釋名矛戈丈八尺惠銳矛屬當準之說文云柯斧柄考工記柯長三尺六韜大柯斧重八斤一名天鉞劉鉞屬當準之周處風土記戟長一丈三尺戮瞿皆戟屬當準之

康王釋喪服而被袞冕諸儒以爲禮之變蘇氏以爲失禮朱子謂天子諸侯之禮與士庶人不同故孟子有吾未嘗學之語如伊訓元祀十有二月朔奉鬯王祇見厥祖固不可用凶服矣漢唐卽位行冊

禮君臣亦皆吉服追述先帝之命以告嗣君蓋異世傳授國之大事當嚴其禮也集傳取蘇氏而不用文公之說案白虎通爵篇天子大斂之後稱王者明民臣之不可一日無君也故尚書曰王麻冕黼裳此大斂之後也何以知不從死後加王也以尚書言迎子釗不言迎王王者既殯而卽繼體之位何緣民臣之心不可一日無君故先君不可得見則後君繼體矣故尚書曰王再拜興對乃受銅瑁明爲繼體君也緣終始之義一日不可有二君

也故尚書曰王釋冕喪服吉冕服受銅稱王以接諸侯明已繼體爲君也釋冕藏銅反喪未稱王以統事也最得先王制禮之意

融堂書解成王之終曰敬遯天威康王之始曰敬忌天威敬忌所以敬遯也

東萊書說殯宮亦稱廟神之所依者也必出廟門俟者廟以內尚爲子廟以外方爲君也

伏生以康王之誥合於顧命共爲一篇歐陽小大夏侯從之今文也馬鄭王本自高祖寡命已上內於

顧命之篇王若曰已下爲康王之誥用古文也今本康王之誥始於王出在應門之內與今文古文皆不合

正義引王肅云畢公代周公爲東伯然則畢公是太師也當太師之名在太保之上此先言太保者於時太保領冢宰相王室任重故先言西方翰案成王顧命之時畢公雖領東方諸侯而未爲太師故後太保而只稱畢公至康王十有二年命畢公保釐東郊乃稱父師此時始爲太師也

白虎通紉冕篇引書曰黼黻衣黃朱紉按此今文尙書也古文尙書布乘黃朱之異文

惟周文武誕受羨若孔傳言文武大受天命而順之正義羨聲近猷故訓之爲道引王肅云羨道也蔡傳以羨里釋之云文王出羨里之囚天命自此始順說不可易封演封氏聞見記相州湯陰縣北有羨里城周回可三百餘步其中平實高於城外地丈餘北開一門相傳文王演易之所曹子建詰紂文云崇侯何功乃用爲輔西北何辜囚之囹圄囹

固既成負土既盈興立炮烙賊害忠貞觀此意見
文王見囚之地紂使負土實此城也未詳子建所
據今按州東頓邱臨黃諸縣多有古小城或周一
里或三百步其中皆實郭緣生述征記云彭城郡
有稔城云是崇侯家自淮迄於淮河上河而實稔
邱壟可阻謂之固然則小城而實皆古人因依立
家以爲保固也子建所云負土既盈或承流俗之
傳耳此事世少引用故並著之

說苑政理篇誅賞者所以別賢不肖也故誅賞不可

以繆誅賞繆則善惡亂矣書曰畢協賞罰

說文支部引周書曰用敷遺後人今書後人下有休
字疑古本無也

底至齊信釋文馬讀底至齊絕句東萊書說是心有
毫釐之未盡則不得謂之底止其至有毫髮之未
實則不得謂之齊壹於信集傳底至者推行而底
其至也齊信者兼盡而極其誠也皆視馬讀爲勝
漢書谷永傳引經曰雖爾身在外迺心無不在王室
罔作無今文也

畢命正義漢初不得此篇有偽作其書以代之者漢書律歷志云康王十二年六月戊辰朔三日庚午故畢命豐刑曰惟十有二年六月庚午肅王命作策書豐刑此偽作者傳聞舊語得其年月不得以下之辭妄言作豐刑耳亦不知豐刑之言何所道也鄭元云今其逸篇有冊命霍侯之事不同與此序相應非也鄭氏所見又似異於豐刑皆妄作也翰案班書律歷志本劉歆三統歷歆與父向親校中秘書此時真古文尙在不應有誤史記周本紀

康王命作策畢公分居里成周郊與書序同則史遷從孔安國問而得古文之說也康成所見亦是孔壁真書未可執晚出之本橫生訾議也

困學紀聞畢命一篇以風俗爲本殷民旣化其效見於東遷之後盟向之民不肯歸鄭陽樊之民不肯從晉及其末也周民東亡而不肯事秦王化之入人深矣

王安石新經義使人有所感動曰風使人有所聽聞曰聲困學紀聞衛石碣以義厲一國而甯遠之類

萃焉晉趙衰以遜化一國而知范之賢繼焉故曰
樹之風聲

禮記緇衣引君雅曰夏暑雨小民惟曰怨資冬所寒
小民亦惟曰怨此書本語也鄭注資當爲至齊魯
語聲之誤也祈之言是也齊西偏之語也夏日暑
雨小民怨天至冬是寒小民又怨天言民恒多怨
爲君其難讀資爲至讀那爲是鄭訓雖異而以經
證經知改資爲下怨下復增一咨字爲梅賾等之
所改也

孟子引書曰丕顯哉文王謨丕承哉武王烈佑啓我
後人咸以正無缺趙岐注書尙書逸篇也今見君
牙篇佑啓作啓佑無作罔閻百詩以此疑晚出之
書非無見也

伯問說文作伯槩宣和博古圖周姜敦銘曰伯景父
作周姜寶敦用夙吉享用斬萬壽注伯景父卽伯
問也是景與罔古字又通用矣

困學紀聞雖收放心閑之維艱孟子求放心之說也
繩愆糾謬格其非心孟子格君心之說也

書序呂命穆王訓夏贖刑作呂刑孔傳呂侯見命爲天子司寇又云復爲甫侯故稱甫刑正義禮記書傳引此篇之言多稱爲甫刑曰故傳解之後爲甫侯故或稱甫刑知後爲甫侯者以詩大雅崧高之篇宣王之詩云生甫及申揚之水爲平王之詩云不與我戍甫明子孫改封爲甫侯案史記甫侯言於王作修刑辟則穆王時已稱甫侯矣孝經序謂春秋有呂國無甫侯考詩王風揚之水篇不與我戍甫不與我戍許毛傳皆訓諸姜也說文解字邑

部饗炎帝太岳之允甫侯所封在潁川从邑無聲又作鄒今經傳皆作許惟史記鄭世家鄒公惡鄭于楚裴駟集解許靈公也鄒字一見爲尙存古耳然則許本是甫侯封國穆王時稱甫侯亦稱呂侯入春秋則爲許故春秋有許國無甫國也許在春秋以前旣爲甫國則呂侯或因氏爲稱若顧命之稱齊侯呂伋也者篇名呂刑或曰甫刑要亦古今文之異也正義引鄭元云呂侯受王命入爲三公引書說云周穆王以呂侯爲相亦與孔傳不同

耄荒釋文耄本亦作毫孔傳耄亂荒忽蔡傳從之引孟子從獸無厭謂之荒以穆王享國百年車轍馬跡遍於天下故史氏以耄荒二字發之亦以見贖刑爲穆王耄荒所訓耳又引蘇氏曰荒大也大度作刑猶禹曰予荒度土功荒當屬下句亦通又謂耄亦貶之之辭案漢書刑法志穆王眊荒命甫侯度時作刑曰詰四方蓋隱用今文尚書語師古注亦以眊亂荒忽爲訓而武帝紀哀夫老眊注云眊古耄字八十曰耄老稱也一曰眊不明之貌眊髦

二字古通用師古注漢志承用孔傳要之年老目昏事理之常大禹謨言耄期倦于勤微子言吾家髦遜于荒亦未見其爲貶周禮鄭注引書度作詳刑推書意正謂穆王耄年慎於作刑耳蘇說自勝蚩尤惟始作亂孔傳九黎之君號曰蚩尤釋文馬云蚩尤少昊之末九黎君名正義引史記五帝本紀云神農氏世衰諸侯相侵伐蚩尤最暴虐莫能伐之黃帝乃徵師諸侯與蚩尤戰於涿鹿之野遂擒殺蚩尤以爲如本紀之言蚩尤是炎帝之末諸侯

名也應劭云蚩尤古天子鄭元云蚩尤霸天下黃
帝所伐者漢書音義有臣瓚者引孔子三朝記云
蚩尤庶人之貪者諸說不同未知蚩尤是何人也
又引楚語曰少昊氏之衰也九黎亂德顓頊受之
使復舊常以爲九黎在少昊之末非蚩尤也正義
獻疑不爲無見乃復通傳說云九黎之文惟本楚
語孔以蚩尤爲九黎下傳又云蚩尤黃帝所滅言
黃帝所滅則與史記同矣孔非不見楚語而爲此
說蓋以蚩尤爲九黎之君黃帝雖滅蚩尤猶有種

類尙在故下至少昊之末更復作亂又述鄭元云
學蚩尤爲此者九黎之君在少昊之代也其意終
以爲疑翰案楚語云三苗九黎之惡與呂刑所序
蚩尤作亂事語吻合鄭元以爲苗民卽九黎之後
顓頊誅九黎至其子孫爲三苗高辛之衰又復九
黎之惡堯興又誅之堯末又在朝舜臣堯又竄之
後禹攝位又在洞庭逆命禹又誅之以三苗例推
則蚩尤爲九黎之君孔馬說非無本也

後漢書孝和帝紀延于平民章懷太子注書延于平

人人字避唐太宗諱及作于所見本異

王符潛夫論述赦篇引書罔不寇賊消義姦宄疑所
引用今文甫刑而鴟作消

尙書大傳周傳降畔寇賊劫略斂攘矯虔者其刑死
漢書武帝紀孟康注引尙書斂攘矯虔說文支部
斂字引周書同段氏撰異大傳及孟康今文尙書
也許氏說文古文尙書也然則古文今文本皆作
斂

爰始淫爲劓則椽黥正義引夏侯等書劓劓劓劓云

臙宮劓劓頭庶劓段氏撰異劓劓劓劓四字古文
尙書也臙宮劓劓頭庶劓七字此今文尙書也自
閻百詩以來皆昧於正義句法不審其脫去與字
轉以臙宮劓劓頭庶劓爲鄭注古文尙書大誤矣
翰案說文支部斂字引周書曰劓劓斂黥正義引
鄭元云劓斷耳劓截鼻椽謂椽破人陰黥謂羈黥
人面可證段氏之說確不可易矣

論衡寒溫篇蚩尤之民洒洒紛紛漢書敘傳同案皆
用今文尙書甫刑語也又論衡變動篇引甫刑曰

庶僂旁告無辜于天帝又譴告篇引甫刑曰報虐用威皆用今文

國語楚語昭王問於觀射父曰周書所謂重黎實使天地不通者何也觀射父對以及少暉之衰也九黎亂德民神雜糅不可方物夫人作享家爲巫史無有要質民匱于祀而不知其福烝享無度民神同位民瀆齊盟無有嚴威神狎民則不蠲其爲嘉生不降無物以享禍灾薦臻莫盡其氣顛頊受之乃命南正重司天以屬神命火正黎司地以屬民

使復舊常無相侵瀆是謂絕地天通與書呂刑合劉氏家龍讀書疑甲編以地天通爲書名云地天通不知何人所作不知成書幾卷乃千古邪教之祖也其說甚創而有理

趙岐孟子注引甫刑曰帝清問下民無皇字案墨子尙同篇引先王之書呂刑道之曰皇帝清問下民是古文原有皇字邠卿脫誤而以帝爲天尤非孔傳以帝爲帝堯陸氏釋文作君帝云君宜作皇字帝堯也新安陳氏云表記引德威惟威德明惟明

繼之曰非虞帝其孰能如是乎則皇帝爲舜明矣
尙書大傳引書曰伯夷降典折民以刑今書作折民
惟刑此古今文之異

後漢書楊賜傳引書曰三后成功惟殷于中臯陶不
與焉蓋吝之也案賜通尙書桓君章句卽歐陽尙
書也此說似未得臯陶爲士專主刑法已能使民
協于中矣三后則以他職贊之故言三后不言臯
陶也

王氏振綱云伯夷典禮宜言禮不言刑乃曰折民惟

刑可見伯夷之刑卽是齊之以禮臯陶明刑宜言
禮不言德乃曰以教祇德可見臯陶之刑卽是道
之以德

後漢書梁統傳引經曰爰制百姓於民之衷士作爰
中作衷今文尙書也

文中子中說薛收曰古人作元命其能至乎阮逸注
元命苞易書也困學紀聞引之以爲春秋緯有元
命苞易書有元命苞薛收蓋謂自作元命其言見
於呂刑阮注誤矣翰案元命苞之名亦取於呂刑

天齊于民俾我一日釋文引馬云齊中也俾作矜云
矜哀也後漢書楊賜傳引尙書天齊于人假我一
日俾又作假然則作矜者古文作假者今文孔傳
本作俾當是傳寫之誤耳

王曰吁釋文吁馬本作于云于於也是古文本作于
後人加口作吁而云歎辭也

漢書敘傳威實輔德刑亦助教季世不詳背本爭末
師古曰不詳謂不盡用刑之理周書呂刑曰告爾
詳刑後漢書劉愷傳章懷太子注文選王仲宣從

軍詩李善注引尙書並作詳刑知古文今文鄭本
孔本皆作從言之詳邦史記作國凡今文尙書多
作國

史記周本紀載呂刑文多與今書不同何擇非人何
敬非刑何度非及度作居及作宜擇敬居下並有
其字五刑簡孚簡孚有衆並作簡信惟官惟反惟
內惟貨惟來其罪惟均作官獄內獄閱實其罪作
惟鈞其過惟貌有稽貌作諷無簡不聽聽作疑墨
辟作黥辟荆辟作贖辟其罰惟倍作倍灑宮辟疑

赦其罰六百鍰作五百率凡鍰字皆作率周禮天
官職金賈公彥疏引其罰爲率與史記同皆參用
今文也

後漢書馮衍傳犍六枳而爲籬兮章懷太子注引周
書小開篇曰嗚呼汝何敬非時何擇非德德枳維
大人大人枳維公公枳維卿卿枳維大夫大夫枳
維士登登皇皇維在國枳維都都枳維邑邑枳維
家家枳維欲無疆注引逸周書小開解之文朱氏
經義考云引周書呂刑篇顯然文誤矣案六枳章

懷注引東觀記作八枳枳字甚新

說文轉字云獄之兩轉也在廷東从棘治事者徐鍇
曰以言詞治獄也故从口案棘卽兩造具備之造
許氏治事字作棘後人皆作曹兩造字作瞽後人
皆作造失古人制字之本義史記周本紀兩造具
備徐廣音義造一作遭則與曹義猶相近也
惟來釋文來馬本作求云有求請賅也集傳訓來爲
干請隱用馬義

漢書刑法志元帝詔引書其審核之段氏撰異云蓋

古文尙書作克今文尙書作核也

說文糸部緇旄絲也从糸苗聲引周書曰惟緇有稽
薛季宜古文訓亦從說文作緇蓋鞫獄時細心紬
繹如治亂絲之義

其罰百鍰孔傳六兩爲鍰鍰黃鐵也正義考工記云
戈矛重三錡馬融云錡量名當與呂刑鍰同俗儒
云錡六兩爲一川不知所出耳鄭元云錡稱輕重
之名今代東萊稱或以六兩爲鈞十鈞爲鍰鍰
重六兩大半兩鍰錡似同也或有存行之者十鈞

爲鍰二鍰四鈞而當一斤然則鍰重一兩三分兩
之二周禮謂鍰爲錡如鄭元之言一鍰之重多於
孔王所說惟按十六銖小釋文引說文云六銖也
錡十一銖二十五分銖之十三也馬融同又云賈
逵說俗儒以錡重六兩周官劔重九錡俗儒近是
陳超就正編其罰百鍰史記作率徐廣曰率卽鍰
也音刷說文錡也漢書蕭望之傳甫刑小過赦薄
罪贖有金選之品應劭曰選音刷金銖名師古曰
字本作錡錡卽鍰也案率選與鍰聲相近今尙書

日新中 卷十一
作鍤蓋錡之訛戴氏震曰六兩大半兩爲錡十二
銖二十五分之十三爲鍤輕重異名不可以假借
呂刑贖罪計錡不計鍤鍤之爲錡字形相涉許君
說文已能辨正矣

漢書刑法志墨罰之屬千劓罰之屬千贖罰之屬五
百宮罰之屬三百大辟之罰其屬二百五刑之屬
三千刑作贖用今文尙書也廬山陳氏云秋官司
刑云掌五刑以麗萬民之罪墨罪五百劓罪五百
官罪五百別罪五百殺罪五百輕罪比舊爲多者

墨劓舊五百今一千各多五百也重罪比舊減者
宮大辟舊各五百今宮減二百大辟減三百也

後漢書劉愷傳引尙書曰上刑挾輕下刑挾重注今
尙書呂刑曰上刑適輕下服下刑適重上服二罪
俱發原其本情須有虧減故言適輕適重此言挾
重挾輕意亦不殊但與本書不同耳翰案不同者
愷傳引用不同也

漢書于定國傳贊哀鰥哲獄案尙書大傳引書曰哀
矜哲獄是班書所本矜鰥古通用釋文折馬鄭王

皆音惹馬云智也惹古哲字然則古文亦作惹獄矣

說文言部訛罪也引周書報以庶訛今書作尤案詩
邶風俾無訛兮釋文訛或作尤則訛尤二字古通用也

目耕帖卷十二

歷城馬國翰竹吾甫

書六

史記晉世家敘文公重耳城濮戰後作王宮于踐土
天子使王子虎命晉侯爲伯云周作晉文侯命王
若曰父義和不顯文武能慎明德昭登于上天布
聞于下維時上帝集厥命于文武恤朕身維予一
人永其在位下接云晉文公稱伯司馬貞索隱云
尙書文侯之命是平王命晉文侯仇之語今此乃

是襄王命文公重耳之事代數懸隔勳策全乖太史公雖復彌縫左氏而系家頗亦時有疎謬裴氏集解亦引孔馬之注而都不言時代乖角何習迷而回醉也黃氏曰抄晉文侯當周東遷有功平王錫文侯有文侯之命此一時也其後晉文公入朝襄王乃獻楚俘天子使王子虎命晉侯爲伯賜大路弓矢秬鬯此又一時也史遷乃取文侯命屬之文公之下義和者文侯字也注者又云能以義和我諸侯誤益甚矣翰案太史公生於漢初職司掌

故又嘗從孔安國問以命辭屬文公重耳當有所據假爲文侯仇事年代懸遠豈應混入且馬融本列書序王上無平字訓義和云能以義和諸侯亦不言文侯仇字也後人第執晚出之書序孔傳以爲真古文因疑斥龍門之信史竊恐太史公不誤而梅賾輩誤傳之爾

林之奇全解書於呂刑之下有文侯之命費誓秦誓三篇竊意周太史所藏典謨訓誥誓命之文纔至呂刑而止後歷幽厲之亂簡編不接其間宣王中

興會諸侯復境土任賢使能南征北伐錫命韓侯
申伯用張仲仲山甫其時大誥命必多矣乃無一
篇見於書意宣王之書必失亡於東遷之亂孔子
既取周太史所藏斷自堯典至於呂刑而於列國
復得命誓三篇遂取而附益其後按左傳鄭子產
曰鄭書有之曰安定國家必大焉先大學引楚書
曰楚國無以爲寶惟善以爲寶是知春秋之世列
國皆有書夫子周流遍觀而於晉得文侯之命於
魯得費誓於秦得秦誓故錄以附於帝王書之末

歟董鼎尙書輯錄纂注文侯之命篇書體與微子
之命蔡仲之命同其事則彼爲封建此爲錫賚耳
班固典引昭登之績匪堯不興鋪聞遺策在下之訓
匪漢不宏蔡邕注引尙書昭登于上段氏撰異今
文尙書作登鋪古文尙書作升敷鋪聞卽敷聞也
漢書谷永傳引經曰亦惟先正克左右師古曰周書
君牙之辭也段氏曰按僞古文君牙永所不見永
正引文侯之命耳

漢書成帝紀鴻嘉元年詔引書曰卽我御事罔克耆

書咎在厥躬注文穎曰此尙書文侯之命篇中辭也言我周家用事者無能有耆老賢者使國之危亡罪咎在其用事者也案此亦用今文

說文支部毀字引周書毀我于艱郭忠恕汗簡引書作并下注悍魏三字石經遺字有旅弓一旅矢百皆與今書不同

費誓尙書太傳周傳作鮮誓史記魯世家作盼誓裴駰解徐廣云盼一作鮮一作彌駟案尙書作棐索隱曰書作棐誓說文米部棐字下云周書有

棐誓案今文作鮮三家經或有作盼者古文則作棐也今書作費誓後人所改

書序東郊不開釋文開舊讀皆作開馬本作闕顏師古匡謬正俗費誓序魯侯伯禽宅曲阜徐夷並興東郊不開孔安國注云徐戎淮夷並起爲寇於東故東郊不開徐仙音開按許氏說文解字及張揖古今字詁林古開字闕古闕字但闕旣訓開故孔氏釋云東郊不開爾不得徑讀闕爲開

困學紀聞子夏問金革之事無辟孔子曰吾聞諸老

聘曰昔者魯公伯禽有爲爲之也鄭注云有徐戎之難喪卒哭而征之急王事也征之作費誓後世起復者皆以伯禽藉口嘗考書多方王來自奄孔注云周公歸政之明年淮夷奄又叛魯征淮夷作費誓魯世家伯禽卽位之後有管蔡等淮夷徐戎並興於是伯禽率師伐之於盼作盼誓據此則伯禽征淮徐在周公未沒之時非居喪卽戎也左傳穀之役晉始盟若伯禽行之則晉不言始矣禮記之言恐非謂費誓也閻百詩云按孔穎達禮疏禮

記伯禽卒哭者爲母喪也劉氏家龍讀書疑謂費誓稱魯人必非伯禽也穆王時徐偃畔而自稱王宣王命召穆公伐淮夷此或召穆公書耳翰案伯禽書不應序次在呂刑文侯之命下然有可疑魯僖亦有伐淮夷事然據史記則實伯禽書也

說文牛部牝字引周書今惟牝牛馬支部戲字引周書戲乃獲食部餼字引周書峙乃餼糗皆漆書古文與今書異者支部穀字引周書穀乃甲冑敵字引周書敵乃干斂字引周書斂乃甯此漆書古文

與今書同者周禮注引書亦作敝乃獲

史記載費誓敕乃甲冑敕作陳祗復之祗作敬踰垣
牆作牆垣三遂作三隧又峙爾芻茭糗糧楨榦無
敢不逮甲戌築而征徐戎無敢不及有大刑多與
今書異參用今文或括書辭義也又吳世家引書
敬復之徐廣音義敬一作振案作振者今文也
我商賚汝釋文商徐音章意蓋作章顯解也

二郊三遂史記正義引王肅云邑外曰郊郊外曰遂
不言四者東郊留守故言三也與孔傳合集解魯

大國三軍故魯三郊三遂案書序言東郊不開則
留守義長

劉氏家龍讀書疑無餘刑非殺語殊難解意芻茭必
須有餘若無餘則加刑焉而刑又酌罪加減或荆
或殺耳說可取

董鼎尚書輯錄纂注孔子序書以魯有治戎征討之
備秦有悔過自誓之戒足爲世法錄之以備王事
猶詩列商魯之頌也

顧氏日知錄有秦誓故列秦誓有秦詩故錄秦詩述

而不作也謂夫子逆知天下之將并於秦而存之者小之乎知聖人矣秦穆公之盛僅霸西戎未嘗爲中國盟主無論齊桓晉文卽亦不敢望楚之靈王吳之夫差合諸侯而制天下之柄春秋以後蓋中衰吳淵頴曰秦之興始於孝公之用商鞅成於惠王之取巴蜀蠶食六國并吞二周戰國之秦也非春秋之秦也其去夫子之卒也久矣夫子惡知周之必并於秦哉若所云後世一男子自稱秦始皇八我房顛倒我衣裳至沙邱而亡近於圖澄寶

誌之流非所以言孔子矣

惠氏九經古義秦誓若弗云來正義員卽云也尙書本作員衛包改從云周益公日記云文苑英華賦多用員來非讀秦誓正義安知今之云字乃員字省文翰案漢書韋賢傳韋孟諫詩師古注引秦誓雖則員然則秦誓古文云皆作員也

說文心部恭字引周書來就恭恭案今本作未就弓忌同是古文何文句殊異如此

說文言部誦字引周書曰截截善誦言又戈部戈字

引周書菱菱巧言案截截菱菱古文異字釋文截
截馬云辭語截削省要也諷馬本作偏云小也辭
約指明大辨佞之人此皆古文義春秋公羊文十
二年傳惟譏譏善淨言俾君子易怠而況乎我多
有之楚辭劉向九歎讒人譏譏孰可愬兮王逸注
引尚書譏譏淨言史記三王世家齊王策俾君子
怠用秦誓語與公羊傳合此皆今文也國語安用
是譏譏者韋昭解巧便言也亦依今文爲說
大學引秦誓如有一介臣作若有一个臣斷斷猗作

斷斷兮其如有容下有焉字如自其口出如作若
是能容之是作寔保我上有能字亦職作尙亦冒
疾作媚嫉不達作不通是不能容是作寔古者經
師多口授故往往殊異斷斷說文引周書作詔詔
古文字也

論衡刺孟篇引尙書黎民亦尙有利哉段氏曰此今
文尙書也子孫上屬黎民下屬斷句

說文阜部隍字引周書邦之杌隍又引徐巡以爲隍
凶也班固說不安也賈侍中說隍法度也徐巡賈

遠皆傳古文班固著太甲篇見隋書經籍志小學類其書佚唯見此一條

孫氏古逸經考按書緯云孔子得黃帝元孫帝魁之書訖於秦穆公凡三千二百四十篇斷可法者百二十篇今序列百篇書止五十八篇其散失者多矣逸文之見於諸書者如民可近也不可上也見周語聖作則慎始而敬終終以不困見左傳不及貢以政接於有庠見孟子將欲敗之必姑輔之將欲取之必姑與之見見國策禹七年水湯五年旱

見墨子大道亶亶去身不遠人皆有之舜獨以之見賈誼書舜彈五絃之琴歌南風之詩而天下治見風俗通厥兆天子爵見白虎通前師乃鼓鼗操見周禮大司馬注刑三百罪莫大于不孝見呂氏春秋母爲權首將受其咎見漢書大翰若翬雉獮有爪而不敢以振見說文又大傳引酒誥王曰封唯曰若圭璧說苑引秦誓附下而罔上者死附上而罔下者刑文選注引周書日月星辰四時歲是爲九星呂覽引夏書天子之德廣運乃神引商書

五世之廟可以觀怪殷本紀引湯誥東為江北為
 濟西為河南為淮今皆無之豈漢魏諸儒偽託歟
 抑聖人所刪之餘與秦焰所遺壁書所漏歟墨子
 引不慎厥德天命焉保謂出禹總德篇孔序并無
 其名則所逸又不獨經文已也翰案孫氏所考逸
 書尚有缺漏今綴於此 章施乃服明于上下尚書
 大傳引 帝誥篇 若德明哉同上引 湯曰予有言人視水見
 形視民知治不伊尹曰明哉言能聽道乃進君國
 子民為善者皆在王官勉哉勉哉湯曰汝不能敬

命予大罰殛之無有攸赦史記殷本紀金履祥曰
 類蓋非湯征之舊也孟子引 周公奉鬯立于阼階
 毫眾往耕之事疑出此篇 漢書王莽傳引 維十
 延登贊曰假王蒞政勤和天 逸書嘉禾篇 允不
 有二年六月庚午肅王命作策豐刑漢書律 允不
 著惟天民不而葆既防凶心天加之咎不慎厥德
 天命焉葆墨子云禹之總德有之 啓乃淫益康樂
 野于飲食將銘莫磬以力湛濁于酒淪食于野萬
 舞翼翼章聞于天大用弗式墨子引 吉日丁卯周
 代祝社方歲于社考以延年壽墨子明鬼篇引古
 案古下有缺文

得璣無小滅宗無大墨子引睇夫聖武知人以屏

輔而身同上引已上佚文有篇目可考其他佚

文散句如居安思危思則有備有備無患 聖作

則並左念茲在茲順事恕施家語小人見姦巧乃

問不言也發罪均 敬哉無天命惟二人而無造

女母崇天之有命也 福不可請禍不可諱並

引子民善之則畜也不善則讎也 惟予一人營居

于成周予一人有善易得而見也有不善易得而

誅也 允哉允哉並呂氏大荒有禱無祀范甯穀

引周惟高宗報上甲微子恃德者昌恃力者亡

史記先其算命漢書前車覆後車戒說苑咨四岳

曰裕汝眾或有一人王者 不施予一人 必立

賞罰以定厥功 太社惟松東社惟柏南社惟梓

西社惟栗北社惟槐 前歌後舞假于上下並白

引師乃指指 宮中之冗食朕實不明以俛伯父

並說文引記人之功忘人之過漢書陳湯

王伯厚謂伯禽唐誥皆策命篇名大傳之序有揜誥

史記殷本紀有太戊一篇孟子注云逸書有舜典

之序律歷志引古文月采篇墨子引有禹總德武
觀禽艾豎年大明去發等篇則是書名尙多有篇
目偶逸者歟

漢書藝文志周書七十一篇劉向日周時誥誓號令
也隋書經籍志雜史周書十卷汲冢書似仲尼刪
書之餘唐書藝文志云汲冢周書十卷亦入雜史
王應麟云隋唐志繫之汲冢然汲冢得竹簡書在
晉咸寧五年而兩漢已有周書矣太史公引克殷
度邑鄭康成注周禮云周書王會解備焉注儀禮

云周書北唐以閻許叔重說文引逸周書大翰若
翬雉又引獬有爪而不敢以掀馬融注論語引周
書月令皆在漢世杜元凱解左傳時汲冢書未出
也千里百縣轡之柔矣皆以周書爲據則此書非
始出於汲冢也按晉束皙傳太康二年汲郡得七
十五篇其目不言周書左傳正義引王隱晉書云
竹書七十五卷六十八卷有名題七卷不可名題
其目錄亦無周書然則繫周書於汲冢其誤明矣
此辯周書非出汲冢能抒獨見但謂杜元凱解左

割开其才哉 徃往用朕朕次則 鰥鰥聳聞 哀克
羽刊筵虞 舜典中之岑 使享嗣 亏于溶 濬 詰 哲 龔
恭 脊 慎 叨 從 三 四 策 麓 雷 底 底 式 三 參 終 亥 女
祖 祖 與 衡 暫 類 又 五 宅 度 凡 禮 婦 歸 豈 封 汜 流 死
災 鳴 叟 驩 兜 皋 罪 班 姓 衆 海 式 二 術 率 庀 宅 常 禹
琴 拜 首 首 高 契 咎 繇 臯 陶 利 播 勇 敷 效 教 居 居 傘
垂 壽 疇 艸 苻 益 衆 栗 但 剛 亡 無 訖 詩 哥 歌 誓 舞
內 納 穴 別 大 禹 謨 戾 矢 帝 帝 宅 道 罔 攸 埜 野 上 無
衆 衆 灋 法 段 賢 道 道 善 善 養 養 芎 平 亥 事 刑 刑 攷

彌 柬 簡 腫 動 岩 會 弃 棄 尔 爾 勛 勳 桌 栗 臯 陶 謨 戮
翼 嬰 遷 大 有 詛 義 憲 常 仓 施 峻 俊 益 稷 塤 思 考 云
栞 刊 泐 滄 食 食 止 上 从 鄰 寫 象 龍 龍 逸 退 庶 庶 止
生 光 峯 蒼 杲 傲 好 庀 度 死 長 皇 凰 絕 幾 起 起
與 興 万 萬 禹 貢 楛 岐 笈 皮 蚤 蠶 中 草 白 齒 易 陽 沃
漢 寢 夢 茆 茅 龜 龜 象 洛 荷 沢 荷 澤 農 旅 邕 雍 莪 織
龍 金 陰 淫 濟 洪 溢 炆 隕 甘 誓 斷 誓 罪 戰 隘 絕 馭
御 翊 戮 五 子 之 歌 念 豫 警 訓 眎 視 於 虜 鳴 呼 琴 平
皇 厚 虫 雖 允 征 蓐 謨 考 云 亂 亂 目 司 湯 誓 逵 遂 致
齒 嫗 館 補 校

詩 古 卷 三 齒 嫗 館 補 校

敢奔稱宰亂資資仲虺之誥志悲迺舊桌栗

伯信怨怨獨獨衰懷湯誥皈歸祇福福禍禍神

神右佑獻獲困淵伊訓肥肥祠魄鬼鼈鯨傲假

器喪或國兮呼祥太甲影諸梟桐脛祇肅肅政

撫至基后後侵辟考云森無粵越闕圖梳機芟憂

泉困迓悅身厥電籠咸有一德烏虜嗚呼亂始盤

庚恣怒害曷茲穢卹恤繇說命微率微子數獲

泰誓程穢收誓誓德考云洪範圍驛慙悔金滕前

冊康誥圭封袞裕楸茂攸酒誥象飲擊牽鑿監

梓材會享亡置無疆攷持季年君蕸芋滋多方靈

靈康王之誥心應畢命忒隱文侯之命蠲盧費誓

敷杜秦誓負云

山井鼎考文物觀補遺尙書有古本經注與書多異

今錄其經字之異者考文堯典敬授人時人作民

汝羲汝作女下皆同舜典格汝舜汝作女下皆同

班瑞于羣后瑞上有五字疇若予工疇作誰聲依

永永作詠大禹謨序禹成厥功厥作丌經艱厥后

艱厥臣允執厥中厥並作丌不虐無告不作弗無

作上九功惟敘九敘惟歌敘並作序臯陶謨允迪厥德都慎厥身厥並作丌下同五禮有庸哉有作五五服五章哉章作彰自我民明威威作畏益稷汝作女篇內皆同否則威之威作畏明庶以功庶作試誰敢不讓不作弗下皆同惟慢遊是好無惟字罔晝夜罔水罔作上下同用殄厥世厥作丌帝拜曰俞無帝拜二字禹貢序任土作貢下有作禹貢三字甘誓威侮五行威作畏左不攻于左汝不恭命不作弗下皆同五子之歌民可近不可下不

作弗下皆同湯誓汝曰我后不恤我衆不作弗下皆同仲虺之誥帝用不臧不作弗篇內皆同奚子后予作我湯誥夏王滅德作威以敷虐威作畏下天命明威同罹其凶害害作虐無從匪彝無卽慝淫無作亡下無以爾萬方同爾有善朕弗敢蔽蔽作弊乃亦有終亦作丌伊訓亦莫不寧不作弗下除不善外皆同茲惟艱哉艱作難太甲上序不明不作弗經文放此萬世有辭辭作享無俾世迷無作亡太甲中無疆之休無作亡下無時豫怠朕承

王之休無數同不明于德自底不類不作弗下皆
同以速戾于厥躬厥作丕下文厥初厥終厥身厥
命並同太甲下惟天無親無作亡鬼神無常享同
天位艱哉艱作難罔不興不作弗下同終始慎厥
與懋敬厥德厥作丕咸有一德伊尹既復政厥辟
厥作丕下文常厥德同動罔不吉罔不凶不作弗
下不獲自盡同盤庚上千今五邦于上有至字由
乃在位由上有曰字小人之攸箴人作民注同悉
至于庭庭上有朝字民用大變用作由汝無侮老

成人無弱孤有幼侮上有老字無作亡無有遠邇
無作亡盤庚中乃登進厥民厥作丕安定厥邦厥
作其無荒失朕命無作亡無起穢無遺育無俾易
種並同罔不惟民之承不作弗不宜乃心爾忱不
屬乃不生生曷不暨朕幼孫有比不救乃死乃有
不吉顛越不恭並同予豈汝威威作畏作丕刑于
朕孫孫上有子字盤庚下無戲怠無作亡無共怒
協比同罔罪爾眾罔有定極罔有弗欽罔並作亡
不肩好貨不作弗說命上不言臣下罔有稟令不

作弗罔作亡下文惟暨乃僚罔不同心臣不命其承疇敢不祇並放此說命中不惟逸豫乃罔不休官不及私昵乃不良干言不並作弗惟其能惟其賢其作厥無患無啓無恥無作亡惟說不言有厥咎厥作其說命下台小子台作朕一夫不獲則曰時予之辜不作弗辜作罪高宗彤日無豐干昵無作亡西伯懋黎序殷始咎周始作亂微子我祖底遂底作致殷罔不小大不作弗召敵讎不怠同將食無災無作亡王子弗出我乃顛隳弗作不隳作

隳泰誓上今商王受弗敬弗作不乃夷居弗事上帝同有罪無罪無作亡底天之罰底作致泰誓中吉人爲善惟日不足不作弗篇內皆同無辜顛天無作亡下皆同泰誓下時厥明時下有日字斲朝涉之脛斲作斲作威殺戮威作畏下洪惟作威同郊社不修不作弗篇內皆同惟朕文考無罪無作亡下無良同牧誓牝雞無晨無作亡昏棄厥遺王父母弟不迪不作弗不愆于六步七步同武成越翼日翼作翌底商之罪底作致今商王受無道暴

殄天物無作亡殄作絕罔不率俾不作弗筐厥元
黃無厥字洪範帝乃震怒不畀不作弗不協于極
不罹于咎百穀用不成並同明作哲作作曰凡厥
庶民無有淫朋無作亡篇內無字皆同無偏無陂
陂作頗五者來備者下有是字一極無凶無作亡
旅葵西旅底貢厥葵厥作其生民保厥居同無有
遠邇無作亡無替其服同人不易物不作弗德盛
不狎侮不役耳目不作無益不貴異物不字並同
金縢無墜天之降寶命無作亡我無以告我先王

同我先王亦永有依歸有下有所字我之弗辟弗
作不大誥不少延洪惟我幼冲人嗣無疆大歷服
不作弗惟下有累字無作亡茲不忘大功不作弗
下文除不敢不知不易不終不僭外皆同天降威
威作畏以于救寧武圖功救作撫下救寧王同民
不靜民下有亦字義爾邦君義作誼無愆于恤無
作亡天棐忱辭辭作詞乃弗肯播弗作不敢弗于
從同肆哉爾庶邦君作肆告我庶邦冢君爽邦由
哲由作用微子之命永世無窮無作亡下文皆同

康誥序封康叔封上有邦字誕受厥命越厥邦厥
民有厥罪小道極厥辜子弗祗服厥父事大傷厥
考心惟厥正人則罔政在厥邦未戾厥心惟厥罪
無在大厥並作其今民將在民上有治字汝不遠
惟商耆成人汝作女篇內皆同不廢在王命不作
弗篇內除不孝不友不能不念不于不率不適不
于外皆同酒誥無彝酒無作亡篇內皆同惟曰我
民迪小子我上有化字永不忘在王家不作弗亦
不暇越怨不易罔不盡傷不惟自息可不大監並

同棗徂邦君御事小子徂作往人無於水監監作
鑒下文民監大監同予惟曰汝劓汝作女下皆同
梓材汝若恒越曰汝作女王啓監監作鑒下皆同
無胥戕無胥虐無作亡召誥錫周公曰拜手稽首
拜上有敦字無疆惟休無作亡下皆放此天迪從
子保面稽天若面上有禽字王先服殷御事殷上
有大字此介于我有周御事介作途不可不敬德
下不作弗下除不監于有夏我不敢知曰有殷罔
不在厥初外皆同監于有殷監作鑒洛誥序周公

往營成周營上有經字王如弗敢及天基命定命
弗作不下文敘弗其絕同咸秩無文無作罔下無
若火同孺子其朋其往朋下有慎字公曰己下有
乎字無遠用戾無作亡亦未克收公功收作撫多
士弗弔弗作不弗克庸同誕淫厥泆泆作洪惟我
事不貳適我不爾動不作弗今爾又曰作爾今又
曰無逸自殷王中宗及高宗及祖甲作自殷王及
高宗下及祖甲君奭弗弔弗作不下弗永弗克弗
戡並同厥基永孚于休厥作其下厥亂同又曰無

能往來無作亡下誕無我責無疆惟休無疆之恤
並同亦惟純佑秉德佑作佐迪知天威威作畏誕
將天畏作誕畏天畏惟若茲誥茲作此明我俊民
俊作峻嗚呼篤棊時二人上有公曰二字亦罔不
能厥初厥作其蔡仲之命克慎厥猷惟厥終改厥
度厥並作其克勤無怠無若爾考皇天無親民心
無常無作聰明無並作亡多方有夏誕厥逸厥作
其厥圖帝之命慎厥麗乃勸厥民圖厥政逸厥逸
圖厥政厥顧天厥字並同開釋無辜無作亡弗克

以爾多方享天之命弗作不享上有其字乃惟爾
商後王逸厥逸下逸作偷下文爾乃惟逸同我惟
大降爾四國民命無惟字我乃其大罰殛之殛作
極立政三宅無義民義作誼下義德同乃弗作往
任弗作不不敢替厥義德不作弗厥作其灼知厥
若顯在厥世放此周官四征弗庭弗作不篇丙除
不庭外不皆作弗訓迪厥官厥作其以利口亂厥
官同無載爾僞無作亡弗畏入畏作弗畏入所畏
君陳惟孝友于兄弟惟孝下有于孝二字作惟孝

于孝友于兄弟茲率厥常厥作其圖厥政惟厥中
簡厥修進厥良並同無敢逸豫無作亡爾無忿疾
于頑同若不克見不作弗下文皆同有辭於永世
辭作詞顧命恐不獲誓言嗣不作弗肆肆不違同
逆子釗於南門之外於作于率維大卜作帥修大
辨康王之誥大保率畢公率作帥皆再拜稽首皆
作並誕受美若受下有厥字昔君文武昔作其不
二心之臣不作弗乃命建侯樹屏侯土有諸字畢
命四方無虞無作亡無窮之基無窮之聞同罔不

祇師言不作弗下文皆同辭尙體要辭作詞惟公
 克成厥終公上有畢字亦有無窮之聞亦作其惟
 慎厥事厥作其君牙亦惟先正之臣正作王無忝
 祖考無作亡小民惟曰怨咨曰作日下同厥惟艱
 哉艱作難啓佑我後人佑作佐先正舊典正作生
 山井鼎曰先正舊典謹按正永懷
 堂本作王古本作生二本似非 罔命罔有不臧
 不作弗下文皆同今予命汝作大正正上有僕字
 無以巧言無作亡下無昵同無昵于儉人昵作暱
 呂刑罔不寇賊不作弗篇內皆同殺戮無辜無作

亡辜作罪越茲麗刑并制罔差有辭刑作戮辭作
 詞民興胥漸胥作匹告無辜于上無作亡下文除
 苗民無辭于罰皆同上帝監民民作人有辭于苗
 辭作詞下師聽五辭五辭簡孚無僭亂辭察辭于
 差獄之兩辭無疆之辭並同文侯之命父義和義
 作誼既我御事既作即紹乃顯祖紹作昭盧弓一
 盧矢百盧作旅傳同費誓嗟人無譁聽命無作亡
 命上有予字無敢不弔無敢寇攘無敢不逮有無
 餘刑無並作亡乃越逐不復不作弗無敢不供無

敢不多同秦誓責人斯無難無作亡下無他技同
若弗云來云作員下雖則云然同射御不違我尙
不欲不作弗君子易辭辭作詞斷斷猗作鮎鮎兮
案鮎當是古文銘字之訛
補遺舜典敬敷五教敬上有而字五子之歌有窮
后羿后上有之字允征惟仲康仲作中伊訓惟奉
祠王祠作嗣盤庚上作福作災作依福依災注同
說命中非知之艱行之惟艱艱並作難注同秦誓
上我聞吉人爲善聞作聽播棄犁老犁作黎注同

秦誓下剖賢人之心剖作割注同武成克伐厥勳
伐作成洪範序武庚庚作康注同金縢禾盡偃厥
下有則字康誥序殺武庚庚作康梓材封以厥庶
民民作人立政三有俊俊作峻下三俊三有俊心
同君陳無求備于一人人作夫顧命甲子王乃洮
頽水無王字一人冕執銳銳上有鉞字君牙率乃
祖考之攸行攸作道費誓並起爲寇並上有以字
山井鼎考文載古本與蔡氏集傳本異者禹貢北過
降水蔡本降作洛東迤北會于匯蔡本于作爲五

子之歌懍乎蔡本作凜乎咸有一德厥德匪常蔡
本匪作靡盤庚上則惟汝衆自作弗靖蔡本汝作
爾武成師逾孟津蔡本逾作渡多士今爾又曰蔡
本又作其君牙亦惟先正之臣古本正作王朱板
蔡本同文侯之命紹乃顯祖古本紹作昭朱板蔡
本同今蔡氏集傳本北會于匯懍乎師逾孟津今
爾又曰並不作為作凜作渡作其則蔡傳亦有別
本也

明豐坊有偽撰古書世學六卷託名其父熙云箕子

朝鮮本者箕子封於朝鮮傳書古文自帝典至微
子止後附洪範一篇云徐市倭本者徐市爲秦博
士因李斯坑殺儒生託言入海求仙盡載古書至
島上立倭國卽今日本是也二國所譯書其曾大
父河南布政使慶錄得之以藏於家顧氏炎武日
知錄辨之曰按宋歐陽永叔日本刀歌徐福行時
書未焚逸書百篇今尙存蓋昔時已有是說而葉
少蘊固已疑之夫詩人寄興之詞豈必真有其事
哉日本之職貢於唐久矣自唐及宋歷代求書之

詔不能得而二千載之後慶乃得之其得之又不以獻之朝廷而藏之家何也至曰箕子傳書古文自帝典至微子則不應別無一篇逸書而一一盡同於伏生孔安國之所傳其曰後附洪範一篇者蓋徒見左氏傳三引洪範皆謂之商書而不知王者周人之稱十有三者周史之記不得謂商人之書也禹貢以道山道水移於九州之前此不知古人先經後緯之義也五子之歌爲人上者奈何不敬以其不叶而改之曰可不敬乎謂本之鴻都石

經據正義言蔡邕所書石經尙書止今文三十四篇無五子之歌熙又何以不考而妄言之也又案王暉玉堂事記中統二年高麗世子慎來朝宴於中書省問曰傳聞汝邦有古文尙書及海外異書答曰與中國不殊今觀日本山井鼎所撰七經孟子攷文皆就唐宋本注疏校訂同異則豐坊之作僞不待辨而可知也

困學紀聞前賢謂臯夔稷契有何書可讀理實未然周官外使掌三皇五帝之書春秋傳所謂三墳五

典是也黃帝顓頊之道在丹書武王所以端統東面而受於師尙父也少皞氏之紀官夫子所以見郟子而學孰謂無書可讀哉又曰呂氏春秋序意曰嘗得學黃帝之所以誨顓頊矣爰有大圖在上大矩在下汝能法之爲民父母不韋十二紀成於秦八年歲在涪灘上古之書猶存前聖傳道之淵源猶可攷也又曰漢初古聖未遠帝王遺書猶有存者賈誼書修政語引黃帝曰道若川谷之水其出無已其行無止顓頊曰至道不可過也至義不

可易也功莫大於去惡而爲善罪莫大於去善而爲惡故非吾善善而已也善緣善也非惡惡而已也惡緣惡也吾曰慎一日帝嚳曰緣巧者之事而學爲巧行仁者之操而與爲仁也故節仁之器以修其財而身專其美矣德莫高於博愛人而政莫高於博利人故政莫大於信治莫大於仁吾慎此而已矣帝堯曰吾存心於先古加志於窮民痛萬姓之罹罪憂衆生之不遂也故一民或饑曰此我饑之也一民或寒曰此我寒之也一民有罪曰此

我陷之也帝舜曰吾盡吾敬而以事吾上故見謂忠焉吾盡吾敬而以接吾敵故見謂信焉吾盡吾敬而使吾下故見謂仁焉吾取之以敬也吾得之以敬也大國諸侯會則問於諸侯曰諸侯以寡人為驕乎朔初則問於士曰諸大夫以寡人為汰乎其間寡人之汰耶而不以語寡人者此教寡人之殘道天下之教也故寡人之所怨莫大於此也困學紀聞引至汰乎又曰民無食也則我弗能使也功成而不利於民我弗能勸也湯曰學聖人

之道者譬其如日靜思而獨居譬其若火舍學聖之道而靜思獨居譬其若去日之明於庭而就火之光於室也然可以小見而不可以大知得賢而舉之得賢而與之譬其若登山乎得不肖而取之得不肖而與之譬其若下淵乎是以君慎其舉而君子慎其與又曰藥食嘗於卑然後至於貴藥言獻於貴然後聞於卑求道者故使人味食然後食者其得味也多使人味言然後聞者其得言也少故以是明王之於言也必自他聽之必自他擇之

必自他聚之必自他藏之必自他行之故道以數

取之為明以數行之為章以數施之萬姓為藏是

故求道者不以目而以心取道者不以手而以耳

致道者以言入道者以忠積道者以信樹道者以

人因學紀聞節去故使人至是故今全錄之又引周文王武王成王問

粥子武王問王子旦師尚父案問粥子是嚮子佚篇問師尚父是太公

書侯淮南子人間訓引堯戒曰戰戰慄慄日慎一

日人莫躓於山而躓於垤此帝王大訓之存於漢

者以上因翰案賈誼新書宗首篇又引黃帝曰日

學紀聞

中必慧操刀必割呂氏春秋去私篇引黃帝曰聲

禁重色禁重衣禁重香禁重味禁重室禁重園道

篇引黃帝曰無常處也有處者乃無處也應同篇

引黃帝曰芒芒昧昧因天之威與天同氣審時篇

引黃帝曰四時之不正也正五穀而已矣漢書胡

建傳引黃帝李法壁壘已定穿窬不繇路是謂姦

人姦人者殺莊列所引尚多不具錄淮南子口口訓引顛頊

之法婦人不避男子於路者祓之於四達之衢荀

子堯問篇堯問於舜曰我欲致天下為之奈何對

曰執一無失行微無怠忠信無倦而天下自來執一如天地行微如日月忠信盛於內賁於外形於四海天下其在一隅邪又性惡篇引堯問於舜曰人情何如舜對曰人情甚不美又何問焉妻子具而孝衰於親嗜欲得而信衰於友爵祿盛而忠衰於君人之情乎人之情乎甚不美又何問焉尸子堯問於舜曰何事曰事天問何任曰任地問何務曰務人又引務成昭之教舜曰避天下之逆從天下之順天下不足取也避天下之順從天下之逆

天下不足失也

莊子亦載堯問舜答不錄

逸周書大聚解引禹

之禁曰春三月山澤不登斧斤以成草木之長夏三月川澤不入網梁以成魚鼈之長且以并農力執成男女之功又文傳解引夏箴曰中不容利民乃外次又引云小人無兼年之食遇天饑妻子非其有也大夫無兼年之食遇天饑臣妾與馬非其有也國語晉語引商銘曰嗛嗛之德不足就也不能為可以矜而祗取咎也嗛嗛之食不足狃也不能為膏而祗離咎也呂氏春秋應同篇引商箴曰天降

災布祥並有其職又謹聽篇引周箴曰天自念斯
學德未暮此皆古帝王之佚語因困學紀聞未載
補綴於此

陸德明云典凡十五篇正典二攝十三十一篇亡謨
凡三篇正二攝一訓凡十六篇正二一篇亡攝十
四三篇亡誥凡三十八篇正八攝三十六十八篇
亡誓凡十篇正八攝二一篇亡命凡十八篇正十
二三篇亡攝六四篇亡熊朋來五經說申其旨云
典謨訓誥誓命凡百篇注者有正與攝之分正者

有其義而正其名攝者無其名而附其義正三十
四攝六十六典十五篇正者二堯典舜典攝者十
三禹貢洪範舊作九共九篇彙飭謨三篇正者二
大禹謨臯陶謨攝者一益稷訓十六篇正者二伊
訓高宗之訓攝者十四五子之歌太甲三篇咸有
一德高宗彤日旅葵無逸周官呂刑典寶明居徂
后沃丁誥三十八篇正者八仲虺之誥湯誥大誥
康誥酒誥召誥洛誥康王之誥攝者三十盤庚三
篇西伯戡黎微子武成金縢梓材多士多方君奭

立政帝告釐沃汝鳩汝方夏社疑至臣扈咸乂四
篇伊陟原命仲丁河亶甲祖乙分器將蒲姑誓十
篇正者八甘誓湯誓泰誓三篇牧誓費誓秦誓攝
者二允征湯征命十八篇正者十二說命三篇微
子之命蔡仲之命顧命畢命冏命文侯之命肆命
旅巢命賄肅慎之命攝者六君陳君牙歸禾嘉禾
成王政亳姑

百篇之序司馬遷云孔子之時周室微而禮樂廢詩
書缺追跡三代之禮序書傳上紀唐虞之際下至

秦繆編次其事故書傳禮記自孔氏劉歆云孔子
修易序書班固云書之所起遠矣至孔子纂焉上
斷於堯下訖於秦凡百篇而爲之序言其作意隋
經籍志云孔子刪書別爲之序各陳作者所出孔
穎達云書序馬融鄭元王肅並云孔子所作依緯
文也百篇凡六十三序劉 曰書列典謨詩含
比興若不先序其意難以曲得其情故每篇有序
敷暢厥義程子云書序夫子所爲逐篇序其作之
之意此皆以書序爲孔子作林之奇云書序乃歷

代史官轉相授受以爲書之總目者非孔子所作
朱子因其說云書序恐卽是經師所作決非夫子
之言自是以後金履祥陳櫟鄒季友孫寶侗之徒
並皆主紫陽說甚有疑其僞造者董銖亦朱子之
徒其言曰書序之作出於聖人無疑學者觀書得
其序則思過半矣其立論不阿如此

朱氏經義考吳文正詩云前漢今文占後晉古文今
若論伏生功遺像當鑄金故所述纂言有今文而
無古文蓋古文出於東晉宋元諸儒疑之者多而

今文則未有疑之者至程子疑金縢之文不可信
而括蒼王廉熙陽作論謂金縢非聖人之書則并
今文而疑之矣甚矣說經之紛綸也又云古文尙
書晉唐以來未有疑焉者疑之自吳才老始而朱
子大疑之其後吳幼清趙子昂王與耕輩羣疑之
至明而梅氏之讀書譜羅氏之尙書是正排擊亦
多術矣近山陽閻百詩氏復作古文尙書疏證其
吹疵摘繆加密而蕭山毛大可氏特著古文尙書
冤詞以雪之合兩家之說無異輪攻而墨守也愚

閣之見是書久頹於學官其言多輟輯逸書成文
無大悖理譬諸汾陰漢鼎雖非黃帝所鑄或指以
九牧之金則亦聽之且如小戴氏禮王制月令緇
衣諸篇明知作者有人參出於漢儒非禮之舊顧
士子誦習守而不改至於易之序卦傳李清臣朱
翌王申子皆疑焉要不得而去也此爲持平之論
李日華紫桃軒雜綴漢書有中文尙書今但知有今
文古文而不知有中文案後漢書劉陶傳陶字子
奇一名偉潁川潁陰人濟北貞王勃之後舉孝廉

除順陽長陶明尙書春秋爲之訓詁推三家尙書
及古文是正文三百餘事名曰中文尙書中文者
謂取古文今文而折其中也

續漢書五行志劉昭注引尙書大傳曰凡六沴之作
歲之朝月之朝日之朝則后王受之歲之中月之
中日之中則正卿受之歲之夕月之夕日之夕則
庶民受之鄭元注自正月盡四月爲歲之朝自五
月盡八月爲歲之中自九月盡十二月爲歲之夕
上旬爲月之朝中旬爲月之中下旬爲月之夕平

旦至食時爲日之朝禺中至日昃爲日之中晡時
至黃昏爲日之夕受之受其凶咎也此蓋夏禮而
伏生傳之今大傳佚此節盧氏見曾雅兩堂補遺
採入

朱氏經義考尙書類出無名氏書傳略說云按周禮
大行人疏禮記檀弓王制玉藻疏曲禮春秋公羊
傳疏俱引是書未詳作者名氏盧氏見曾並採入
尙書大傳補遺則略說爲大傳篇目之一也

漢書儒林傳世所傳百兩篇者出東萊張霸分析合

二十九篇以爲數十又采左氏傳書敘爲作首尾
凡百二篇篇或數簡文意淺陋成帝時求其古文
者霸以能爲百兩徵以中書校之非是書正義霸
僞作舜典汨作九共九篇大禹謨益稷五子之歌
允征湯誥咸有一德典寶伊訓肆命原命武成旅
葵罔命二十四篇蓋亦略見百篇之序今其書佚
北堂書鈔引百兩篇云伊尹死大霧三日則王伯
厚謂張霸僞百兩篇而爲緯者附之卽此可信矣
孔衍有漢尙書十卷後漢尙書六卷後魏尙書十四

今御府所藏有夏禹治水圖裴孝源貞觀公私書
史有無名氏禹貢圖宋史藝文志有程大昌禹貢
論圖朱子語錄三衢夏唐老作九疇圖范氏天一
圖書目有無名氏福極對義圖王世貞四部藁有
李郡旅葵圖樓鑰攻媿集有金滕圖說黃潛文獻
集有跋顧直之金滕圖崔植疏開元初宋璟爲幸
相手寫無逸一篇爲圖以獻元宗置之內殿出入
觀省唐國史紫宸殿設無逸圖文彥博潞公集邇
英北壁有仁宗朝講官王洙所寫無逸圖此皆就

尚書一篇爲圖者也圖皆佚矣世傳合沙鄭氏宋
刻尚書圖一卷不著撰人名圖凡七十有七一書
篇名二逸書篇名三作書時世四君臣名號五唐
虞夏商周譜系六歷象授時七堯典四仲中星八
日永日短九閏月定時成歲十七政十一五辰十
二璿璣玉衡十三律度量衡十四時月日十五明
魄朔望十六日月冬夏十七箕畢風雨十八九族
十九六宗二十堯制五服二十一禘成五服二十
二疏家弼五服二十三歷代九州封域二十四六

年五服朝二十五諸侯玉帛二十六十二章服二十七五聲八音二十八六律六呂二十九韶樂器三十東坡禹迹三十一隨山濬川三十二九州境三十三鄭氏別州三十四別州圖說三十五導山三十六導山圖說三十七導水三十八導江三十九導江圖說四十導河四十一導淮四十二導濟四十三通冀四十四任土四十五任土圖說四十六諸篇內地名四十七九州山名四十八九州川名四十九禹乘四載五十東坡辨水五十一舜十

二州五十二三條五岳五十三聶氏河議五十四濬猷澮距川五十五洛書自然數五十六九疇本河圖數五十七洛書本文五十八皇極本數五十九九疇本大衍數六十九疇相乘得數六十一洪範九疇總六十二劉向洪範傳六十三老泉先生洪範六十四老泉先生洪範論六十五頴濱五事六十六頴濱洪範五事說六十七商遷都六十八商七廟六十九周營洛邑七十召誥土中七十一干羽七十二周彝七十三太常七十四圭瓚七十

五牧誓兵器七十六費誓兵器七十七諸儒傳授
書學所謂聶氏謂麟也合沙漁父鄭東卿自號當
卽其所著書也其圖詳賅可與聶崇義三禮圖無
名氏爾雅圖鼎足矣

朱子書說宋史藝文志陳振孫書錄解題文獻通考
並著錄七卷陳氏曰晦庵門人黃士毅集其師說
之遺以爲此書晦庵於書一經獨無訓傳每以爲
錯簡脫文處多不可強通今惟二典禹謨召誥洛
誥金縢有解及九江彭蠡皇極有辨其他從文集

語錄中摘出都穆云蓋當時門人取語錄文集中
語以成之非朱子意也朱氏經義考文公書說黃
氏所錄外又有湯氏中所輯今不傳困學紀聞載
朱文公曰蘇氏傷於簡林氏傷於繁王氏傷於鑿
呂氏傷於巧然其間儘有好處案蘇軾東坡書傳
十七卷林之奇尙書集解五十八卷王安石新經
尙書十三卷又洪範傳一卷呂祖謙東萊書說十
卷林書至洛誥而止呂書自洛誥而終時瀾又增
脩東萊書說並見文獻通考朱子所取四家是也

文獻通考又載吳棫書禘傳十三卷首卷舉要曰
總說曰書序曰君辨曰臣辨曰考異曰訓詁曰差
互曰孔傳凡八篇考據詳博又鄭樵書辨詘七卷
其目曰糾繆四闕疑一復古二樵以遺逸召用博
物洽聞然頗迂僻朱子於二家亦每取之

白居易補湯征長慶集載之今錄全文於此葛伯荒
怠禮廢祀湯專征諸侯肇徂往之湯若曰格爾三
事之人逮於有衆落乃心正乃容明聽余言咨爾
先格王有彝訓曰祿無常荷荷於仁福無常享享

於敬惠乃道保厥邦獲乃德殄厥世惟葛伯及易
天道怠棄邦本虐於民慢於神社稷宗廟罔克尊
奉暨山川鬼神亦靡禋祀告曰罔犧牲以供俎羞
予畀厥牛羊乃既以盜食曰罔黍稷以奉粢盛予
佑厥黍稷乃困於仇餉今爾衆曰葛罪其如台予
聞曰爲邦者祇奉明神撫綏烝民二者克備乃克
保厥家邦吁廢於祀神震怒肆於虐民離心頃繩
契以降暨於百代神怒民叛而不顛躋者匪我攸
聞小子履以涼德欽奉天威肇征有葛咨爾有衆

克濟厥功其有傲師徒戒車乘敬君事者有明賞
其有罔率職罔戮力不恭命者有常刑明賞不僭
常刑無赦嗚呼朕告汝衆君子監於茲欽哉懋哉
罰及乃躬不可侮



